

四庫全書

集部

欽定四庫全書

集部
宋文選卷六

詳校官中書臣張經田

助教臣常循覆勘

總校官知縣臣楊懋珩

校對官中書臣王家賓

謄錄監生臣章玉植

欽定四庫全書

宋文選卷六

范希文文

帝王好尚論

老子曰我無為而民自化我好靜而民自正我無欲而民自樸此則述古之風以警多事之時也三代以還異於太古王天下者身教化使民從善故禮曰人君謹其所好惡君好之則民從之孔子曰上好禮則民莫敢不

敬上好義則民莫敢不服上好信則民莫敢不用情由
此言之聖帝明王豈得無好在其正而已堯設敢諫鼓
建進善旌舜好問而成至化禹拜昌言而立大功湯五
聘伊尹文王躬迎呂望周公握髮吐哺以待白屋之士
鄭武公好賢而詩雅歌之燕昭王築臺募士而智者歸
之斯聖賢好尚如是之急也桀紂好利欲不好諫諍而
天下亡秦好兵刑不好仁義而天下歸漢隋煬帝好逸
豫不好恭儉而天下歸唐使桀紂好諫諍秦好仁義隋

煬帝好恭儉豈有喪亂之禍哉

推委臣下論

天生兆人得主乃定萬幾百度不可獨當內立公卿大夫士外設公侯伯子男先擇材以處之次推公以與之然則委以人臣之職不委以人君之權臣請辨之夫執持典禮修舉政教均和法令調理風俗內養萬民外撫四彛師表百僚經緯百事此宰輔之職也練兵戎謹城壁修方畧威遠人此將帥之職也肅朝廷之儀觸縉紳

之邪此御史府之職也治繁劇制豪猾此京尹之職也
至於金穀刑法各有攸司之職矣撫民人宣風化均徭
役平賦斂此刺史縣令之職也是皆人臣之職不可不
委之也若乃區別邪正進退左右操榮辱之柄制英雄
之命此人主之權也不可盡委於下矣何以明之論語
孔子曰天下有道政不在大夫晉委三卿趙文子韓宣
子魏獻子
延陵季子曰晉國之政歸此三家矣後果分晉為三國
漢高祖招納羣英有將將之權而取天下至於子孫不

知祖宗之謀而獨委霍光又獨委王鳳至於王莽皆有
大禍西漢遂傾焉後漢光武親用二十八將而取天下
後之子孫不知祖宗之謀而獨委后族至於宦官故奸
雄競起以去惡為名東漢遂傾焉魏委司馬晉委劉裕
其禍亦然唐太宗駕馭英雄取天下致太平至高宗朝
李義府以立后之功獨見委用陷害忠良天下憤怨明
皇初用姚崇宋璟為相而天下大治推心委之遂成故
事及李林甫代其任仍復委之林甫奸邪能中傷善人

朝廷無敢言得失者於是明皇不聞諫諍自謂宰相得人泰然無為矣言路已絕故至祿山犯關嚮闕而明皇不知一旦喪亂天下瓦解唐德遂衰初以推委而天下治終以推委而天下亂何弊之然哉當推委之際擢十人上從其九是九分之恩出於下矣如此則數年之間左右前後皆權臣之黨也若黜辱十人上從其九是九分之威出於下矣如此則數年之間中外遠近無敢忤權臣者故下之情不達而上之勢孤矣此明皇之失為

後代之鑒王者將收其權必先采人采人為難豈無其要
孔子之辨門人標以四科一曰德行二曰政事三曰言
語四曰文學以四科辨之思過半矣然則朝廷清要之
位覬覦者衆必審賢以與之賢傑之才讒嫉者衆必先
時以辨之是故先王孜孜求賢以備選用且千官百辟
豈能獨選必委之於輔弼矣惟清要之職雄劇之任不
可輕授於人僉諧之外更加親選聖帝明王常精意於
求賢不勞慮於臨事精意求賢則日聰明而自廣勞心

臨事則日叢脞而自困宜乎屏煩細而廣詢訪其深於正道有憂天下之心可備輔相者記之其精於經術通聖人之旨可備顧問者記之其敢言正色有端士之操可備諫諍者記之其能言方畧有烈士之風可備將帥者記之如斯之人精而求之熟而觀之然後寘清要之職授雄劇之任使人人竭力爭為腹心於是乎得以操榮辱之柄制英雄之命庶務委於下而柄歸於上始可以言無為矣猶復置御史大夫中丞使縉紳無敢慢者

置諍臣七人使言路無敢蔽者置門下封駁司使制勅
無得悞者此又推委無為之中而不廢其防不失其權
者矣若留意逸豫不孜孜於求賢親選之時無賢可用
則進退賞罰復歸於下雖有爵祿不足為上之恩雖有
誅罰不足為上之威矣

選任賢能論

王者得賢傑而天下治失賢傑而天下亂張良陳平之
徒秦失之亡漢得之興房杜魏褚之徒隋失之亡唐得

之興故曰得士者昌失士者亡書曰先王昧爽不顯坐以待旦旁求俊彥啟迪後人其勤求人材如是之急也然則求之之道不可一端皐陶贊禹曰亦行有九德乃言曰載采采禹曰何皐陶曰寬而栗柔而立愿而恭亂而敬擾而毅直而溫簡而廉剛而塞強而義彰厥有常吉哉孔子之門人目以四科一曰德行謂顏淵閔子騫也二曰政事冉有季路也三曰言語宰我子貢也四曰文學子游子夏也此所謂求人之道非一端也又書之

說命篇曰旁求俊乂列於庶位是朝廷庶位惟俊乂是求唐太宗曰天下英雄落吾彀中語曰邦有道則智邦無道則愚智則可與治國家安天下愚則可與避怨惡而全一身故聖人以俊乂為得不以柔訥為行如以柔訥為行而寵之則四海英雄失望於時矣使英雄失望於時則秦失張陳隋失房杜豈不悞天下之計矣

上皇帝時務書

天聖三年四月二十日文林郎守大理寺丞臣范仲淹

謹請閣門再拜死罪上書皇太后陛下皇帝陛下臣聞
巧言者無犯而易進直言者有犯而難立然而直言之
士千古謂之忠巧言之人千古謂之佞今臣勉思藥石
竊犯雷霆不遵易進之塗而居難立之地者欲傾臣節
以報國恩恥佞人之名慕忠臣之節感激而發萬死無
恨況臣之所言皆聖朝當行之事而未之行者諒有以
也聖人之心豈不至此蓋當乎一日萬幾未暇餘論大
臣之心豈不至此蓋懼乎上疑下謗未克果行臣請言

之以發聖慮臣聞國之文章應於風化風化厚薄見乎文章是故觀虞夏之書足以明帝王之道覽南朝之文足以知衰靡之化故聖人之理天下也文弊則救之以質質弊則救之以文質弊而不救則晦而不彰文弊而不救則華而將落前代之季不能自救以至於大亂乃有來者起而救之故文章之薄則為君子之憂風化其壞則為來者之資惟聖帝明王文質相救在乎已不在乎人易曰窮則變變則通通則久亦此之謂也伏望聖

慈與大臣議文章之道師虞夏之風況我聖朝千載而會惜乎不追三代之高而尚六朝之細然文章之列何代無人蓋時之所尚何能獨變大君有命孰不從風可敦諭詞臣興復古道更延博雅之士布於臺閣以救斯文之薄而厚其風化也天下幸甚臣又聞聖人之有天下也文經之武緯之此二道者天下之大柄也昔諸侯暴武之時孔子曰俎豆之事則嘗聞之矣此聖人救之文也文武之道相濟而行不可斯須而去焉唐明皇之

時太平日久人不知戰國不慮危大寇犯關勢如瓦解
此失武之備也經曰禍兮福所倚福兮禍所伏又曰防
之於未萌治之於未亂聖人當福而知禍在治而防亂
故善安身者在康寧之時不謂終無疾病於是有節宣
方藥之備焉善安國者當太平之時不謂終無危亂於
是有教化經畧之備焉我國家文經武緯天下大定自
真宗皇帝之初猶有舊將舊兵多經戰敵四鄰之患足
以禦防今天下休兵餘二十載昔之戰者今已老矣今

之少者未知戰事人不知戰國不慮危豈聖人之意哉
而況守在四夷不可不慮古來和好鮮克始終漢和親
而匈奴大舉唐封冊而吐蕃至渭上陸贄議云威之下
悟撫之不懷雖或時有盛衰大抵常為邊患屬方靖中
夏未遑外虞因其乞盟遂許結好加恩降禮有欲無違
而乃邀求寢多翻覆不定託因細事嘖有煩言猜矯多
端其斯可驗此唐人之至論也今自京至邊並無關嶮
其或恩信不守釁端忽作戎馬一縱信宿千里各邊少

名將則懼而不守或守而不戰或戰而無功再扣澶淵
豈必尋好未知果有幾將可代長城伏望聖慈鑒明皇
之前轍察陸贄之讜議與大臣論武於朝以保天下先
命大臣密舉忠義有謀之人授以方畧委之邊任次命
武臣密舉壯勇出羣之士試以武事遷其等差壯士蒙
知必懷報效列於邊塞足備非常其或自謂無虞不欲
生事輕長世之策苟一時之安邊患忽來人情大駭自
古兵不得帥魚肉無殊乃於倉卒鬪戰之間拔萃為將

豺狼競進真偽交馳此五代之前鑒也至於塵埃之間
豈無壯士宜復唐之武舉則英雄之輩願在彀中此聖
人居安慮危之備備而無用國家之福也惟聖意詳之
臣又聞先王建官共理天下必以賢俊授任不以爵祿
為恩故百僚師師各揚其職上不輕授下無冒進此設
官之大端也我國家累聖求理而致太平大約紀綱法
象唐室以臣觀之宜法唐興之時不宜法唐衰之後唐
興之時特開館殿以待賢俊得學士十八人聲滿天下

此文皇養將相之材以論道經邦而大化也暨之中興
往往得人唐衰之後此選不盛我朝崇尚館殿目為清
華相輔之材多由此選三館清密古謂登瀛近歲遷出
內庭逼居坊陌非唐所謂集仙之館也又其間校讎之
職或不由科第以恩而除限以歲年漸於清顯輕十八
學士之選恐非文皇養將相之材之意也伏望聖意與
大臣議其可否重為制度以法唐興之時而延廊廟之
器此國家之大義也惟聖意詳之又諫官御史耳目之司

不諱之朝宜有賞勸自陛下臨政以來未聞旌一諫員
賞一御史若言而無補是選之不精言而有補豈賞之
不行徒使犯顏者危緘口者安以進藥石為虛言以陳
絲髮為供職三載之後進退雷同臣恐天下竊議朝廷
言路未廣忠臣未勸將令諫官御史之徒尸素於朝非
國家之福也惟聖意詳之臣又聞先王義重君臣賞延
於世大勲之後立賢為嗣餘子則以才自調不使混淆
而後大防一隲顏波千載凡居近位歲進子孫簪紱盈

門冠蓋塞路賢與不肖例升京朝謂之賞延無乃太甚
此必前代君危臣僭之際務相姑息因為典故以至於
斯又百司之人本避鄉後不踰數歲例與出官莫非貪
惡之徒絕異孝廉之舉使親民政其弊如何開此二途
歲取百數無所不有實累王風恐非任官惟賢之體也
人避衆怨不敢上言遂令仕路紛紜祿位填委文武官
吏待闕踰年貪者益勵其爪牙廉者悉困於寒餓徒於
禮闈之內增其艱難壯士惜年數歲一舉廼為奔競至

有訟爭而況修辭者不求大才明經者不問大旨師道
既廢文風益澆詔令雖繁何以勸戒士無廉讓職此之
由其源未澄欲波之清臣未之信也倘國家不思改作
因循其弊官亂於上風壞於下恐非國家之福也儻為
長久之策則願與大臣特新其議澄清此源不以謗議
為嫌當以治亂為意此國家之福也惟聖意詳之臣聞
以德服人天下欣戴以力服人天下怨望堯舜以德則
人愛君如父母秦以力則人視君如仇讎是故御天下

者德可憑而力不可恃也伏惟皇太后陛下皇帝陛下
日崇聖德以求服天下之心若夫敦好生之志推不忍
之心薄於刑典厚於惻隱在物祝網於民泣辜常戒百
官勿為苛酷示天下之慈也唯聖人能之恥珠玉之玩
罷組綉之貢焚晉武之雉裘出文皇之宮人少度僧尼
不興土木示天下之儉也唯聖人能之雞鳴而起孜孜
聽政每有餘暇則召大臣講議文武訪問艱難此皇王
之勤也唯聖人勉之貴賤親踈賞罰惟一有功者雖憎

必賞有罪者雖愛必罰捨一己之私從萬人之望示天下之公也唯聖人行之自古帝王與佞臣治天下天下必亂與忠臣治天下天下必安然則忠臣骨鯁而易踈佞臣柔順而易親柔順似忠多為美言骨鯁似強多所直諫美言者得進則佞人滿朝直諫者見踈則忠臣避世二者進退何以辨之但日聞美言則知佞人未去此國家之可憂也日聞直諫則知忠臣在右此國家之可喜也伏惟聖明不可不察自古王者外防強敵內防姦

邪強敵侵國姦邪敗德國侵則害加黎庶德敗則禍起
蕭牆乃知姦邪之凶甚於夷狄之患伏惟聖明常好正
直以杜姦邪此致理之本也臣又聞聖人宅九重之深
鎮萬國之望以靜制動以重為威如天之高如地之深
使人不得容易而議也昨覩鑾駕順動稍頻恐非深居
九重靜鎮萬國之意况進奏院報於天下天下聞之恐
損威重先朝以御宇日深功成天下巡幸之費尚或諫
止今繼明之始聖政方新宜加憂勤深防逸豫則人心

大悅天道降康不比先帝功成之年未可輕為巡幸伏
惟聖慈再三詳覽每有順動必循典禮以服天下之望
臣又聞人主納遠大之謀久而成王道納淺末之議久
而成亂政方今聖人在上賢人在側取舍之際豈有未
至然而刑法之吏言絲髮之重輕錢穀之司舉錙銖之
利病則往往謂之急務響應而行或有言政教之源流
議風俗之厚薄陳聖賢之事業論文武之得失則往往
謂之迂說廢而不行豈朝廷薄遠大之謀好淺末之議

哉伏望聖慈納人之謀用人之議不以遠大為迂說不以淺末為急務則王道大成天下幸甚臣又聞聖人之至明也臨萬幾之事而不敢獨斷聖人之至聰也納羣臣之言而不敢偏聽獨斷則千慮或失偏聽則衆心必離人心離則社稷危而不扶聖慮失則政教差而彌遠故先王務公共設百官而不敢獨斷者懼一慮之失也開言路采羣議而不敢偏聽者懼衆心之離也今聖政方新動思公共委任兩地出入萬幾萬幾之繁能無得

失乃許羣臣上言以補其闕使上無蒙蔽下無壅塞有以見聖人之不獨斷也天下幸甚然而臣下上言密陳得失未可盡信以為實亦當深究其宜或務窺人短長或欲希旨上下動搖賞罰之柄離隔君臣之情似是而非言偽而辨雖聖鑒之下能無惑焉偶動宸衷無益王道似此密奏之類更望聖慈深加詳覽與大臣議論可否然後施行倘密奏之言便以為實內降處分一面施行則讒譖之人緣隙而進以訐為直以詐為忠使內外

相疑政教不一非致理之本也古人有言曰為君難為
臣不易者其在此乎伏惟聖明不可不察又自古親近
小臣率多纖佞恃國恩寵為人階緣公議未行私請先
至如此則人皆由徑政有多門伏望聖慈深為防慮以
存至公之道也臣曲陋之人本無精識覽前王之得失
究聖朝之取舍因敢罄而陳之伏望聖慈詳擇一二千
犯天威臣無任戰汗激切屏營之至臣仲淹昧死謹言

上執政書

天聖五年月日丁憂人范仲淹謹擇日望拜上書於史館相公集賢相公參政侍郎參政給事某居親之喪上書言事踰越典禮取笑天下豈欲動聖賢之知為身名之計乎仲淹謂居喪越禮有誅無赦豈足動聖賢之知耶矧親安之時官小祿薄今親亡矣縱使異日授一美衣對一盛饌尚當泣感風樹憂思無窮豈今几筵之下可為身名之計乎不然何急急於言哉蓋聞忠孝者天下之大本也其孝不逮矣忠可忘乎此所以冒哀上書

言國家事不以一心之戚而忘天下之憂庶乎四海生
靈長見太平況今聖人當天四賢同德此千百年中言
事之秋也然聖賢之朝豈資下士之補益乎蓋古之聖
賢以芻蕘之談而成大業者多矣豈俟仲淹引而質之
況儒者之學非道不談仲淹敢企仰萬一因擬議以言
之皆今易行之事其未易行者仲淹所不言也恭惟相
府居百辟之首享萬鍾之厚夙興夜寐未始不欲安社
稷躋富壽答先帝之知致今上之美況聖賢存誠以萬

物為體思與天下同其安樂然非思之難致之難矣仲淹竊覽前書見周漢之興聖賢共理使天下為富為壽數百年則當時致君者功可知矣周漢之衰奸雄競起使天下為血為肉數百年則當時致君者罪可知矣李唐之興也如周漢焉其衰也亦周漢焉自我宋之有天下也經之營之長之育之以至於太平累聖之功豈不大哉然否極者泰泰極者否天下之理如循環焉惟聖人設卦觀象窮則變變則通通則久非知變者其能久

乎此聖人作易之大旨以授於理天下者也豈徒然哉
今朝廷久無憂矣天下久太平矣兵久弗用矣士曾未
教矣中外方奢侈矣百姓久困窮矣朝廷無憂則苦言
難入天下久平則倚伏可畏兵久弗用則武備不堅士
曾未教則賢材不充中外奢侈則國用無度百姓困窮
則天下無恩苦言難入則國聽不聰矣倚伏可畏則奸
雄或伺其時矣武備不堅則鄰狄或乘其隙矣賢材不
充則名器或假於人矣國用無度則民力已竭矣天下

無恩則邦本不固矣倘相府思變其道與國家磐固基
本一旦王道復行使天下為富為壽數百年由今相府
致君堯舜之功也儻不思變其道而但維持歲月一旦
亂階復作使天下為血為肉數百年亦今相府負天下
之過也昔曹參守蕭何之規以天下久亂與人息肩而
不敢有為者權也今天下久平修理政教制作禮樂以
防微杜漸者道也張華事西晉之危而正人無徒故維
持紀綱以延歲月而終不免禍以大亂天下今聖人在

上老成在右豈取維持之功而忘磐固之道哉仲淹竊
請相府報國致君之功正在乎固邦本厚民力重名器
備鄰敵杜奸雄明國聽也固邦本者在乎舉縣令擇郡
守以救民之弊也厚民力者在乎復游散去冗僭以阜時
之財也重名器者在乎慎選舉敦教育使代不乏材也
備遠人者在乎育將材實邊郡使人無覬覦也杜奸雄
者在乎朝廷無過生靈無怨以絕亂之階也明國聽者
在乎保直臣斥佞人以致君於有道也夫舉縣令擇郡

長以救民之弊者何哉仲淹觀今之縣令循例而授多
非清識之士衰老者為子孫之計則志在苞苴動皆徇
已少壯者恥州縣之職則政多苟且舉必近名故一邑
之間簿書不精吏胥不畏徭役不均刑罰不中民利不
作民害不去鰥寡不恤游惰不禁播莠不增孝悌不勸
以一邑觀之則四方縣政如此者十有七八焉而望王
道之興不亦難乎仲淹恐來代之書論得失者謂相府
有不救其弊之過矣如之何使斯人之徒為民父母以

困窮其天下又朝廷久有擇縣令郡長之議而不遂行者蓋思退人以禮不欲動多士之心故務因循而重改作也豈長世之策哉倘更張之際不失推恩又何損於仁乎今約天下令錄自差京朝官外不過千數百員自來郊天之恩鮮及州縣若天下令錄自大禮以前滿十考者可成資日替與職官七考以上可滿日循其資俸除錄事叅軍則縣令中昏邁常常之流可去數百人矣蓋職官錄事叅軍不甚親民為害亦細此謂退人以禮

士豈有怨心哉其間課最可尚論薦頗多俟到銓衡別
議時賞前既善退後當精選其判司簿尉仍賜令錄之
俸其曾任令錄有遇該恩合入本資者可依初入之例
頒此數條合入者鮮然後委清望官於幕職判司簿尉
中歷三考以上具理績舉充其川廣福建縣令可委轉
運使等就近於判司簿尉中舉移庶從人便若此後諸
處縣令特有課最可旌尚者宜就遷一官更留三載庶
其宣政者可以成俗其僥倖者自從朝典如此行之三

五年中天下縣政可澄清矣願相府為天下生靈而行之為國家磐固基本而思之不以聽芻蕘為嫌而罷之則天下幸甚幸甚仲淹又觀今之郡長鮮克盡心有尚迎送之勞有貪燕射之逸或急急於富貴之援或孜孜於子孫之計志不在政功焉及民以獄訟稍簡為政成以教令不行為坐鎮以移風易俗為虛語以簡賢附勢為知幾清素之人非緣囑而不薦貪黷之輩非寒素而不糾縱胥徒之奸剋寵風俗之奢僭况國有職制禁民

越禮頒行已久莫能舉按使國家仁不足以及物義不足以禁非官實素食民則菜色有恤鰥寡則指為近名有抑權豪則目為掇禍苟且之弊積習成風俾斯人之徒共理天下王道何從而興乎仲淹恐來代之書論得失者亦謂聖朝有不救其弊之過矣然朝廷以黜陟郡長為難者官有定制不欲動搖懼其招怨謗而速僥倖爾故知縣兩任例升通判通判兩任例升知州奈何在下之時飾身修行邀其清舉居上之後志滿才乏愆於

素持止能偷安未至覆餗故賢愚同等清濁一致此乃朝廷避怨於上移虐於下俟其自敗民何以堪故鄭莊公伺共叔之自斃而春秋罪焉以其長惡也易曰履霜堅冰至由辨之不早辨也此聖人昭昭之訓豈用於先王而廢於今日者哉近年諸處郡長以贓致罪者數人皆貫盈之夫久為民患如此之類至終不敗者豈止數人而已乎雖轉運使提點刑獄職在訪察其如位望相亞怨仇可敵非致敗露鮮敢發明宜乎論道之間無以激揚

天下古者天子五載一巡皇上凝命於今六載矣以軍國重大未可行遠古之道今郊禮之餘宜宣大慶可於兩制以上密選賢明巡行諸道以興利除害黜幽陟明舒慘四方豈同常務可命御史嚴諭百僚與出使之官絕書刺往返之禮仍翌日省途以禁請託苟利天下大體何傷所出使之官宜以宣慶為名安遠聽也其諸道知州通判耄者懦者貪者虐者輕而無法者墮而無政者皆可奏降以激尸素又四方利弊得以上聞未舉巡守之

禮而遣觀風之使非不典也然後委清望官於朝臣通判中舉諸郡長於朝臣知縣中舉諸通判今後通判之官非著顯效及有殊薦雖或久次止可加恩郡國之符不當輕授其知縣之人入通判者宜比此例如此行之天下郡政其濫鮮矣今一司一務猶或舉官一郡之間生靈數萬反可輕授於人乎願相府為天下生靈而行之為國家磐固基本而行之不以聽芻蕘為嫌而罷之天下幸甚幸甚仲淹前所謂官有定制不欲動搖懼其

招怨謗而速僥倖者兩宮聖人臨軒命使激揚善惡澄
清天下何怨謗之有乎自茲以降非舉不授舉官之責
厥典非輕何僥倖之有乎如所舉之人果成異政則宜
旌尚舉主以勸來者聖朝未行此典蓋亦闕矣縣令郡長
既得其才然後復游散去冗僭以阜時之財者何哉仲
淹觀天下穀帛厥價翔起議者謂生靈既庶使之然矣
仲淹謂生者既庶則作者復衆豈既衆之為累哉蓋古
者四民秦漢之下并及緇黃共六民矣今又六民之中

浮其業者不可勝紀此天下之大蠹也士有不稽古而
祿農有不竭力而饑工多奇器以敗度商多奇貨以亂
禁兵多冗而不急緇黃蕩而不制此則六民之浮不可
勝紀而皆衣食於農者也如之何物不貴乎如之何農
不困乎仲淹謂穀帛之貴由其播藝不增而資取者衆
也金銀之貴由其制度不嚴而器用者衆也或謂資四
夷之取而使之然則山川之所出與恩信之所給自可
較之非仲淹所敢知也今議更張之制繁細非一仲淹

敢略而陳之夫釋道之書以真常為性以清淨為宗神而明之存乎其人智者尚難於言而況於民乎君子弗論者非今理天下之道也其徒繁穢不可不約今後天下童行可於本貫陳牒必詰其鄉黨苟有罪戾或父母在鮮人共養者勿從其請如已受度而父母在別無子孫勿許方遊則民之父母鮮轉死於溝壑矣斯亦養惻獨助孝悌之風也其京師寺觀多招四方之人宜給本貫憑由乃許收錄斯亦辨奸細復游散之要也其天下

寺觀每建殿塔蠹民之費動踰數萬止可完舊勿許創
新斯亦與民阜財之端也又古者兵在於民且耕且戰
秦漢之下官軍為常貴武勇之精備征伐之急也今諸
軍老弱之兵詎堪征伐旋降等級尚費資儲然國家至
仁旨在存活若詔諸軍年五十已上有資產願還鄉里
者一可聽之稍省軍儲復從人欲無所歸者自依舊典
此去冗之一也又諸道巡檢所統之卒皆本城役徒殊
非武士使之禁暴十不當一而諸州常患兵少日旋招

致穀帛之計其耗萬億以仲淹觀之自京四嚮千里之間或多寇盜蓋創制巡檢路分頗多而卒伍至羸捕掩無效非要害者宜悉罷之所存之處資以禁軍訓練既精寇盜如取況千里之內抽發非難又使少歷星霜不至驕惰彼無用之卒可減萬數庶使諸郡節於招致此去冗之次也又京畿三輔五百里內民田多隙農功未廣既已開導溝洫復須舉擇令長使詢訪父老研求利病數年之間力致富庶下被什一之稅繼以百萬之糴

則江淮餽運庶幾減半挽舟之卒從而省焉此亦去冗之大也至於工之奇器敗先王之度商之奇貨亂國家之禁中外因之侈僭上下得以驕華宜乎大變澆漓申嚴制度使珠玉寡用穀帛為寶此又去僭豐財之本也今盛明之代何事而不可行乎曩者國家禁泥金之飾久未能絕一旦使命婦不服工又不作於今天下無敢衣者使其餘奢僭皆如泥金之法亦何患不禁乎又播藝之家古皆督責今國家有勸農之名無勸農之實每

於春首則移文於郡郡移文於縣縣移文於鄉鄉矯報於縣縣矯報於郡郡矯報於使利害不察上下相蒙豈朝廷之意乎若縣令郡長一變其人乃可詔書丁寧復游散之流抑工商之侈去士卒之冗勸稼穡之勤以周禮司徒之法約而行之使播者藝者以時以度勤者惰者有勸有戒然後致天下富之壽之彼不我富不我壽者豈能革之哉此則厚民力固邦本之道也觀夫國風之七月小雅之甫田皆以農夫之慶為王化之基豈聖

人不思而述者乎故周漢李唐雖有禍亂而能中興者
人未厭德作亂者不能革天下之心是邦本之固也六
朝五代之亂鮮克中興者人厭其德弔民者有以革天
下之心是邦本之不固也然則厚民力固邦本非舉縣
令擇郡長則莫之行焉或謂舉擇令良久則乏人亦何
道以嗣之仲淹謂用而不擇賢孰進焉擇而不教賢孰
繼焉宜乎慎選舉之方則政無虛授敦教育之道則代
不乏人今士林之間患不稽古委先王之典宗叔世之

文詞多纖穢士惟偷淺言不及道心無存誠暨於入官
鮮於致化有出類者豈易得哉中人之流浮沉必矣至
於明經之士全暗指歸講議未嘗聞威儀未嘗學官於
民上貽笑不暇責其能政百有一焉詩謂長育人材亦
何道也古者庠序列於郡國王風云邁師道不振斯文
銷散由聖朝之弗救乎當太平之朝不能教育俟何時
而教育哉乃於選用之際患其才難亦由不務耕而求
穫矣今春詔下禮闈凡修詞之人許存策論明經之士

特與旌別天下之望翕然稱是其間所存策論不聞其誰激勸未明人將安信倘使呈試之日先策論以觀其大要次詩賦以觀其全才以大要定其去留以全才升其等級有講貫者別加考試人必彊學副其精舉復當深念治本漸隆古道先於都督之郡復其學校之制約周官之法興闕里之俗設文學掾以專其事敦之以詩書禮樂辨之以文行忠信必有良器蔚為邦材況州縣之用乎夫庠序之興由三代之盛王也豈小道哉乎

謂得天下英才而教育之一樂也豈偶然哉行之數年
士風丕變斯擇材之本致理之基也又李唐之盛常設
制科所得大才將相非一使天下奇士學經綸之盛業
為邦家之大器亦策之上也先朝偶屬多務暫停此科
今可每因貢舉之時申其隆典必有國士繼於唐人豈
非邦家之盛選歟勿謂未必得人遂廢其道此皆慎選
舉敦教育之道亦何患乏人哉倘國家行此數事若今
刑政之用心無不成焉前代亂離鯨吞虎噬無卜世卜

年之意故斯道久缺反為不急之務既在承平之朝當
為長久之道豈如西晉之禍而有何公之嘆者乎願朝
廷念祖宗之艱難相府建風化之基本一之日圖之二
之日行之不以聽芻蕘為嫌而罷之則天下幸甚幸甚
至於岩穴草澤之士或節義敦篤或文學高古宜從聘
召之禮以厚澆競之風國家近年羔雁弗降或有考槃
之舉不踰助教之命孝廉之士適以為辱何敦勸之有
乎又流外之官澄清未至沿之則百姓受弊革之則諸

司之人將使羣謗不興衆心知勸不若敦仍舊之制加
獎善之方自簿尉兩任有舉奏者許入錄事參軍錄事
參軍有舉奏者許入職事官或換三班使臣既有進身
之階豈無畏法之志設使流內之人無遷進之望而能
盡公者必亦鮮矣今後百司新入之人或采其藝能
或出于仕族行藏必審考試必精避役之人無圖之類
嚴革其弊高為之防既激其流復澄其源亦何患流外
之冗乎仲淹又謂育將材實邊郡使人無覬覦者何哉

蓋聞古之善禦敵者將不乏人則師戰而不衄邊不乏
廩則城圍而不下敵疑且畏罔敢深入此劉漢之所以長
也不善禦敵者將在貴臣邊須遠饋故戰之則衄圍之
則下敵無疑畏乘虛深入此石晉之所以亡也今兵久
不用未必為福在開元之盛有潼關之敗可龜鑑矣何
哉昔之戰者耄然已老今之壯者囂而未戰聞名之將
往往衰落豈無晚輩未聞邊功此必廟堂之所思也仍
聞沿邊諸將不謀方畧不練士卒結援弭謗固祿求寵

一旦急用萬無成功加以邊民未豐邊廩未實罷武之際兵足食寡如屯大軍必煩遠饋則中原益困四夷益驕深入之虞未可量也於時廟堂之上雖有皋陶之謀伯益之贊不亦難乎夫天下禍福如人家道成於覆簣敗於疾雷聖朝豈恃其太平而輕其後計王衍之鑒豈曰不明清談之間坐受其弊蓋備之弗預知之弗為許下之兵日血十萬豈不痛心哉今西北和好誠為令圖安必慮危備則無患晉成周之盛王道如砥及觀周禮

則大司馬陣戰之法粲然具存乃知禮樂之朝未嘗廢武今孫吳之書禁而廢學苟有英傑受亦何疑且秦之焚書也將以愚其生人長保天下及其敗也陳勝吳廣豈讀書之人哉況前代名將皆洞達天人嗣續忠孝將門出將史有言焉今將家子弟蔑聞韜鈴無所用心驕奢而已文有武備此能備乎今可於忠孝之門搜智勇之器堪將材者密授兵畧歷試邊任使其識山川之向背歷星霜之艱難一朝用之不甚顛沛十得三四不云

欽定四庫全書

宋文選
卷六

盛乎至於四海九州必有壯士宜設武舉以收其遺唐
郭子儀武舉所得者也斯可遺乎又臣僚之中素有才
識可賜孫吳之書使知文武之方異日安邊多可指任
此皆育將才之道也又沿邊知同精加舉擇特授詔命
專謀耕桑三五年間豐其軍廩此則實邊郡之道也將
材既育邊郡既實師戰而不衄城圍而不下敵疑且畏
敢深入乎縱有騷動朝廷可高枕矣前代禦敵其策非
一唐陸贄議緣邊備守之術請置本土之兵勤營田之

利與今事宜相近可約而行也本土之兵者若今之北
邊有雲翼招收之軍更可増致作為奇兵至於營田之
利宜常興作而加焉願相府為國家安危思之五代之
亂非遠也為河朔生靈思之景德之前未久也今相府
勞一夕之思絕百代之恥無使中原見新羈之馬赤子
入無知之俗則天下幸甚聖人曰微管仲吾其被
髮左衽又曰民到於今受其賜管仲伯臣也而能安邊
境保華夏功高當時賜及來代况朝廷之盛德乎仲淹

又謂朝廷無過生靈無怨以絕亂之階者何哉蓋天下
奸雄無代無之或窮為夜舞或起為大盜伺朝廷之過
執以為辭幸生靈之怨弔而稱義不然亦何名而動哉
今明盛之朝豈有大過亦宜辨於毫末杜其堅冰或戚
近撓權或土木耗國或祿賞未均或綱紀未修或任使
未平斯亦過之漸也仲淹敢小舉其失以言之國家戚
近之人不可不約除拜之際宜量其才非曰惜恩懼乎
致寇若力小任重則撓權亂法增朝廷之過啟奸雄之

志易曰小人而乘君子之器盜思奪之矣所謂盜者其
奸雄之謂乎今道路傳聞或緇黃之流或術藝之輩結
託戚近邀求進貢或受恩賜或與官爵此撓權之漸矣
可不畏乎夫賞罰者天下之衡鑑也衡鑑一私則天下
之輕重妍醜從而亂焉此先王之所慎也又土木之興
久為大蠹或謂土木之費出於內帑無傷財害民之弊
故為之而弗戒也仲淹謂內帑之物出於生靈太祖皇
帝以來深思遠慮聚之積之為軍國急難之備非諂神

佞佛之資也國家祈天永命之道豈在茲乎如洞真壽寧之宮以延燎之災一夕逮盡豈非天意警在帝心示土木之所崇非神靈之所據也安可取民人膏血之利輟軍國急難之備奉有為之惑冀無狀之福豈不誤哉一旦有倉卒之憂須給賞之資雖欲重困生靈暴加率斂其可及乎此耗國之大也可不戒哉倘謂內藏豐盈用不可竭則日者黃河之役使數十州之人極力負資奔走道路豈惜府庫之餘而不用之耶故土木之妖宜

其悉罷豈相府之不言乎兩宮之不聽乎又文武百官之祿取兵荒五代之制或職輕祿重或職重祿輕重輕之間奔競者至大亨之世猶患不均豈聖朝之意乎所宜損之益之以建其極又今三司之官差除頗異祿賜弗輕何知弊而不言多養望以自進天下金穀浹於羣胥培克無厭取怨四海使先帝寬財之命弗逮於民和氣屢傷豐年寡遇曾不謂之過乎蓋由三司之官不制考限不責課最朝受此職夕求他官直云假塗相與匿

禍天下受僇職此之由豈聖朝之意乎宜其別制攷課重議賞罰激朝端之俊傑救天下之疲瘵其庶幾乎又古之勲臣賞延於世今則每舉大慶必行此典自兩省以上奏薦子弟並為京官比於庶僚亦既優矣而特每歲聖節各序子孫謂之賞延黷亂已甚先王名器私假於人曾不謂之過乎非君危臣僭之朝何其姑息之如是耶遂使廕序之人塞於仕路曾未稽古使以司民國家患之屢有釐革然但革其下而不革其上節於彼而

不節於此天下豈以為然哉我相府豈惜一孺之恩不為百辟之表乎又遠惡之官多在寒族權貴之子鮮離上國周旋百司之務懵昧四方之事况百司者朝廷之綱紀風教之戶牖咸在童孺曾無激揚使寺省之規剝床至足公卿之嗣懷安敗名未嘗試難何以致遠非獨招縉紳之議實亦玷鈞衡之公此則祿賞未均任使未平綱紀未修之類也斯弊已久何可極乎惟我相府能革其弊能變其極而天下化成不為難矣晉趙王倫石

勒之徒心窺天子口責丞相豈非奸雄之人伺朝廷之
過乎又今久安之民不經塗炭勞則易怨擾則易驚猛
將謀臣威信未著況邊民尚困邊廩尚乏苟有騷動饋
運所艱武備未堅敵志可騁既撓之以征戰或加之以
飢饉生靈窮匱奸雄奮迅鼓舞羣小血視千里此五代
之鑒昭昭焉非止方冊之有云抑亦耳目之可接也我
太祖皇帝亦嘗有事四方勞於饋運而生靈不敢怨奸
雄不敢動者何哉一則餘民久在塗炭乍覩明盛如予

得毋縱有勞役未甚曩昔此生靈所以不敢怨也又當
乘天開之運震神武之威征伐四方動如山壓况躬擐
甲冑備嘗艱難猛將如雲謀臣如雨此奸雄所以不敢
動也所謂彼一時此一時爾今朝廷豈謂當時之易而
不慮今日之難乎又謂保直臣斥佞人以致君於有道
者何哉有若人未之病則苦口之藥鮮進焉國未之危
則逆耳之言鮮用焉故佞人易進直言易退其致君於
有道也難哉及其既病也藥必錯雜而進故鮮效焉及

其既危也言必錯雜而用故鮮功焉蓋佞人在矣直人遠矣其悔之也難哉今朝廷久安苦言而不用者勢使之然矣天深戒而不變者禍可畏矣伏聞京師去歲大水今歲大疫四方聞之莫不大憂此天之有以戒也豈徒然乎而京師之災甚於四方何哉蓋京師者政教之所出君相之所居也禍未盈而天未絕故鑒戒形焉不獨恐懼其心必使修省其政國家之德尚可隆天下之道尚可行也倘弗懼於心弗修於政漸盈於禍漸絕於

天則國家四海將何如哉或謂國家之災由厯數之定
非政教之出若如所論則夏商九疇之書果妖言耶豈
欲棄而焚之乎苟天下有善則歸諸已天下有禍則歸
諸天豈聖賢之用心哉願黜術士之言奉先王之訓必不
謬矣必無過矣至於保直臣斥佞人則兩宮二省之心如
日星焉孰可蔽其明乎縱有行偽而堅言偽而辨試於
行事人焉廋哉往日不極言而今極言者學陋之人思
慮未精又親安之時上懼失祿不幸親今亡矣朝廷或

怒之自頂至踵惟忠也又何憂乎倘相府思變其道與國家作長久之計固其基本一旦王道復行使天下為富為壽數百年則福在國家功在相府得與天下生靈長見太平幸甚幸甚竊以五代以來諸侯暴酷視民如芥生殺由之皇朝龍興典章一寬真宗皇帝至仁如天盡心於此內則舉執法之吏外則創按刑之司徒流之間無敢差者若今於教化之道復如刑名之用心亦何患不至乎今縉紳之間多議按刑之司無益於外亦思之

未深耳如得其人糾察四方絕斯民之寃協先帝之志
豈無益乎得人而已不可謂川之久平可壞其防也今
王刑既清王道可行此天下士人為相府惜其時也或
曰天下之事猶指諸掌豈相府弗克行乎亦在兩宮之
意爾謂夫人主在上或喜怒生殺或好惡邪正則諫諍
之際為臣不易也若乃修四方之政教正百司之綱紀
澄清風俗相府之職也豈必兩宮之意乎倘相府疑仲
淹之言謂欲求聖賢之知為身名之計豈不能終喪之

後為歌為頌潤色盛德以順美於時亦何必居喪上書
踰越典禮進逆耳之說求終身之棄而自置於貧賤之
地乎蓋所謂不敢以一心之戚而忘天下之憂是不為
身名之計明矣觀前代國家當其安也士人上言論興
亡之道非聖王賢相則百不一采及其往也則後之史
臣收於簡策為來代之鑒今日之言願相府采其一二
為國家天下之益不願後之史臣收於簡策為來代之
鑒狂斐之人誅赦惟命以廟堂深嚴恐不得上乃敢相

門之下各致此書庶有一達於聰明干犯台嚴下情無任惶恐激切之至不次仲淹死罪惶恐再拜

上晏侍郎書

天聖八年月日具銜范仲淹謹齋沐再拜上書於資政侍郎閣下仲淹近者伏蒙召問曾上封章言朝廷禮儀事果有之乎仲淹嘗辱不次之舉矧公家之事何敢欺默因避席而對曰有之遽奉嚴教云爾豈憂國之人哉衆或議爾以非忠非直但好奇邀名而已苟率易不已

無乃為舉者之累乎仲淹方一二奉對公曰勿為彊辭
仲淹不敢犯大人之威再拜而退退而思之則自疑而
驚曰當公之知惟懼忠不如金石之堅直不如藥石之
良才不為天下之奇名不及泰山之高未足副大賢人
之清舉今乃一變為尤能不自疑而驚乎且當公之知
為公之悔倘默默不辨則恐搢紳先生謂公之失舉也
如此仲淹何面目於門牆哉請露肝膈之萬一皆質於
前志非敢左右其說惟公之采擇庶幾仲淹進不為賢

人之疑退不為賢人之累死生幸甚死生幸甚仲淹天
不賦智昧於幾微而但信聖人之書師古人之行上誠
于君下誠于民深切自謂有憂天下之心由是時政得失
或嘗言之豈所謂不知量也蓋聞昔者聖人求天下之
言以共理天下於是命百官箴闕百工獻藝則大臣小
臣無非諫也建善旌立諫鼓諮芻蕘采謠詠斯則何遠
何近咸可言也此誠歷代令王懼上有所未聞下有所
未達特崇此道以致天下之言俾九重之深無所蔽也

亦必憂國大臣懼義有所未從諫有所未上復廣此道以致天下之情冀萬乘之心有以動也仲淹又聞事君有犯無隱有諫無訕殺其身有益於君則為之衛顗曰非破家為國殺身成君者誰能犯顏色觸忌諱建一言哉亦忠臣之分也而曰不在其位不謀其政者謂各司其局不相侵官如當二千石之位則不責尚書之政當尚書之位則不責三公之政非言畧之謂矣又曰天下有道庶人不議蓋言有道之朝教化純被則庶人無所

議為仲淹登進士第由幕府歷宰寺為九卿之屬似非
庶人敢不議乎如云遠不當諫則伯夷叩馬諫武王豈
近臣哉太公謂之義士夫子稱其賢人曾不以遠而為
過也至於賴考叔曹劌杜簣弦高魯仲連梅福之徒皆
遠而謀國者也前史嘉之況國家以公之清舉置仲淹
於近閤同文館之列唐文皇於此延天下之才使多識
前言往行以諮政教之得失備廊廟之選用如朝廷延
才之意不減於前則仲淹事君於此非遠也又聞言未

及而言謂之躁今國家詔百官轉對使明言聖躬之過失宰司之闕遺其不預轉對者俾實封章奏以聞則仲淹非言未及而言也若以仲淹好奇為過則伊尹負鼎太公直釣仲尼誅侏儒以尊魯夷吾就縲紲而霸齊藺相如奪璧於強鄰諸葛亮邀主於敝廬陳湯矯制而大破單于祖逖誓江而克清中原房喬杖策於軍門姚崇臂鷹於渭上此前代聖賢非不奇也仲淹患好之未至爾若以仲淹邀名為過則聖人崇名教而天下始勸莊叟

云為善無近名乃道家自全之說豈治天下者之意乎
名教不崇則為人君者謂堯舜不足慕桀紂不足畏為
人臣者謂八元不足尚四凶不足恥天下豈復有善人
乎人不愛名則聖人之權去矣經曰立身揚名又曰善
不積不足以成名又曰恥沒世而名不稱焉又曰榮名
以為寶是則教化之道無先於名三古聖賢何嘗不著
於名乎仲淹患邀之未至爾仲淹又聞天生蒸民自食其力
惟士以有德可以安君可以庇民於是聖人率民以養

士易曰不家食吉如其無德何食之有仲淹官小祿微然歲受俸祿僅三十萬竊以中田一畝取粟不過一斛中稔之秋一斛所售不過三百金則千畝之獲可給三十萬以豐歉相半則仲淹歲食二千畝之入矣其千畝中播之耨之獲之歛之其用天之時地之利民之力多矣倘仲淹無功而食則為天之螟為民之螣使鬼神有知則為身之殃為子孫之患仲淹今職在校讎務甚清素前編後簡海聚雲積其間荒唐詭妄之書十有七八

朱紫未辨膏肓奈何仲淹棲遲於斯絕無補益上莫救斯文之弊下無庇斯人之德誠無事而食矣所可薦於君者惟忠言耳況我國家以六合之廣四葉之盛撫既濟之會防未然之幾兢兢持盈旰不暇謂今天下民庶而未富士薄而未教禮有所未格樂有所未諧多士之源有所未澄百司之網有所未振兵輕而有所未練邊虛而有所未計賞罰或有所未一恩信或有所未充乃詔百官轉對其未預者並許封章此吾君盡心以虛受

天下之言也亦天下君子盡心以助成王道之日也然獻言之初上或有所賞於是浮淺僥覲之輩爭為煩言或采其細而傷其大或誇其利而隱其害下冒上之寵而矯其辭上疑下之躁而輕其說此政教之大害也仲淹遠觀五帝三王爵以尚德祿以報功未有賞其空言者至於舜俞禹拜惟重其言而行之逮夫春秋之時則有舉賢之賞唐文皇賞孫伏伽之諫以天下始定而權以進之未始久行焉今朝廷必欲求有道之言在其擇

而必行不在其誘於必賞言而無賞則真有憂天下之心者不廢其進焉然後下不冒上之寵而直其辭上不疑下之躁而重其說此政教之大利也仲淹亦嘗聞長者之餘論鬱於胸中而莫敢罄發者恥與浮淺僥覲之徒受上之疑於國門矣仲淹昨輒言國家冬至上壽之禮者斯言有罪必不疑其僥覲矣是故輕一死以重萬代之法請皇帝率親王皇族於內中上皇太后聖壽請詔宰官率百僚於前殿上兩宮聖壽實無減皇太后尊崇

之盛又足存皇帝貴高之體蓋一人與親王皇族上壽
於內則母子之義親君臣之禮異與百僚上壽於外則
是行君臣之儀非敦母子之義在今兩宮慈聖仁孝之
德而行此典則未見其損奈何後代必有舊族強熾竊
此為法以仰制人主者矣聖朝既不能正之使後代忠
臣何所執議先王制禮之心非萬世利則不行焉或謂
五帝不相沿樂三王不相襲禮此何泥於古乎仲淹謂
禮樂等數沿革可移帝王名器乾坤定矣豈沿革之可

言哉若謂仲淹不知聖人之權則孔子何以謂晉文公
譎而不正以臣召君不可以訓書曰天王狩於河陽是
諱其權而正其禮也豈昧於權哉小臣昧死力言大臣
未能力救苟誠為今日之事未量後代之患豈小臣之
狂言大臣之未思也仲淹天拙之效不以富貴屈其身
不以貧賤移其心倘進用於時必有甚於今者庶幾報
公之清舉如求少言少過自全之士則滔滔乎天下皆
是何必仲淹之舉也夫天下之士有二黨焉其一曰我

發必危言立必危行王道正直何用曲為其一曰我遜
言易入遜行易合人生安樂何用憂為斯二黨者常交
戰於天下天下理亂在二黨勝負之間爾倘危言危行
獲罪於時其徒皆結舌而去則人主蔽其聰大臣喪其
助而遜言遜行之黨不戰而勝將寔盛於中外豈國家
之福大臣之心乎人皆謂危言危行非遠害全身之謀
此未思之甚矣使搢紳之人皆危其言行則致君於無
過致民於無怨政教不墜禍患不起太平之下浩然無

憂此遠害全身之大也使搢紳之人皆遜其言行則致君於過致民於怨政教日墜禍患日起大亂之下怵然何逃當此之時縱能遜言遜行豈遠害全身之得乎凡今之人生於太平非極深研幾豈斯言之信哉昔魏晉之亂哲人懼憂至有管寧之徒涉海而遁仲淹今進危言於君親蹈危機於朝廷不猶愈於涉海之險而遁於異域者乎倘以仲淹遠而盡心不謂之忠言而無隱不謂之直則而今而後未知所守矣惟公察仲淹之詞求

仲淹之志謂尚可教則願不悔前日之舉而加平生之知使仲淹罄誠於當時垂光於將來報德之心宜無窮已倘察仲淹之志如不可數則願昌言於朝以絕其進前奏既已免咎此書尚可議責使黜之辱之不為賢人之累則仲淹退藏其身省求其過不敢以一朝之責而忘平生之知報德之心亦無窮已恭惟資政侍郎羽翼舊賢股肱近輔赫赫之猷天下所望願論道之餘一賜鑒慮與其進則天下如仲淹之徒皆不召而進矣與其

退則天下如仲淹之徒皆不斥而自退矣決天下進退者其在公一言乎干犯台嚴不任戰懼之至不宣仲淹再拜

上時相議制舉書

天聖八年五月日具位仲淹再拜上書於昭文相公閣下仲淹昨者伏蒙聖恩優賜差任蓋鈞造之際靡不獲所退省踈拙且驚且懼况唐虞舊域風俗淳儉獄無積訟亭鮮過客棲遲偃仰何以報國然嘗試思之似有所補

敢不冒黷而言之夫善國者莫先育材育材之方莫先勸學勸學之要莫尚宗經宗經則道大道大則才大才大則功大蓋聖人法度之言存乎書安危之幾存乎易得失之鑒存乎詩是非之辨存乎春秋天下之制存乎禮萬物之情存乎樂故俊哲之人入乎六經則能服法度之言察安危之幾陳得失之鑒析是非之辨明天下之制盡萬物之情使斯人之徒輔成王道復何求哉至於叩諸子獵羣史所以觀異同質成敗非求道於斯也有

能理其書而不深其旨者雖樸愚之心未可與適道然
必顧瞻禮義執守規矩不猶愈於學非而博者乎今文
庠不振師道久缺為學者不根乎經籍從政者罕議乎
教化故文章柔靡風俗巧偽選用之際常患才難仲淹
聞前代盛衰與文消息觀虞夏之純則可見王道之正
觀南朝之麗則知國風之衰惟聖人質文相救變而無
窮前代之季不能自救則有來者起而救之是故文章
以薄則為君子之憂風俗其壞則為來者之資今朝廷

思救其弊興復制科不獨振舉滯淹詢訪得失有以勸天下之學育天下之才是將復小為大抑薄歸厚之時也斯文丕變在此一舉然恐朝廷命試之際謂所舉之士皆能熟經籍之六義知王伯之要畧則反屏而弗問或將訪以不急之務雜以非聖之書辨二十八將之功勲陳七十二賢之德行如此之類何所補益蓋欲伺其所未至誤其所常習不以教育為意而以去留為功若如所量恐非朝廷勸學育才之道也何哉國家勸學育

才必求為我器用輔我風教設使皆明經之士並練王伯之術問一得十亦朝廷教育之本意也況文有精粗理有優劣明試之下得失尚多何患去留之難乎今或伺其所未至誤其所常習則天下賢俊莫知所守將博習非聖旁攻異端聖人之門無復啟發逮於後舉差之益遠如此則制科之設足以誤多士之心不足以救斯文之弊恭惟前聖之文之道昭昭乎為神器於天下得之者昌失之者亡後世聖人開學校設科等率賢俊以

趨之各使盡其心就其器將以共理於天下故書曰咸
有一德斯之謂矣願相府為此一舉倘昌言於兩制如
能命試之際先之以六經次之以正史該之以方畧濟
之以時務使天下賢俊翕然修經濟之業以教化為心
趨聖人之門成王佐之器十數年間異人杰士必穆穆
於王庭矣何患俊人不充風化不興乎救文之弊自相
公之任也當有吉甫輩頌吾君之德吾相之功登於金
石永於天地者矣四海幸甚千載幸甚千犯台嚴無任

僭越戰汗之至仲淹再拜

南京書院題名記

皇宋闢天下建太平功揭日月澤注河漢金革塵積弦
誦風布乃有睢陽先生贈禮部侍郎戚公同文以責於
丘園教育為樂門弟子由文行而進者自故兵部侍郎
許公驤而下凡若干人先生之嗣故都官郎中維樞密
直學士綸並純文浩學世濟其美清德素行貴而能貧
祥符中鄉人曹氏請以金三百萬建學於先生之廬學

士之子殿中丞舜賓時在私庭俾幹其裕故太原奉常
博士瀆時與賢良始掌其教故清河職方員外郎吉甫
時以管記以領其綱學士畫一而上真宗皇帝為之嘉
歎而可其奏今端明殿學士盛公侍郎度文其記前參
預政事陳公侍郎堯佐題其額由是風乎四方士也如
狂望兮梁園歸歟魯堂章甫如星縫掖如雲講議乎經
詠思乎文經以明道若太陽之御六合焉文以通理若
四時之妙萬物焉誠以日至義以日精聚學為海則九

河我吞百谷我尊淬詞為鋒則浮雲我決良玉我切然
則文學之器天成不一或醇醇而古或郁郁於時或峻
於層雲或深於重淵至於通易之神明得詩之風化洞
春秋褒貶之法達禮樂制作之情善言二帝三王之書
博涉九流百家之說者蓋互有人焉若夫廊廟其器有
憂天下之心進可為卿大夫者天人其學能樂古人
之道退可為鄉先生者亦不無矣觀夫二十年間相繼
登科而魁甲英雄儀羽臺閣蓋翩翩焉未見其止宜觀

名列以勸方來登斯綴者不負國家之樂育不孤師門之禮教不忘朋簪之善導孜孜仁義惟日不足庶幾乎刊金石而無愧也抑又使天下庠序規此而興濟濟羣髦咸底於道則皇家三五之風步武可到戚門之光亦無窮已他日門人中絕德至行高尚不仕如睢陽先生者當又附此焉

嚴先生祠堂記

先生漢光武之故人也相尚以道及帝握赤符乘六龍

得聖人之時臣妾億兆天下孰加焉惟先生以節高之
既而動星象歸江湖得聖人之清泥塗軒冕天下孰加
焉惟光武以禮下之在蠱之上九衆方有為而獨不事
王侯高尚其事先生以之在屯之初九陽德方亨而能
以貴下賤大得民也光武以之蓋先生之心出乎日月
之上光武之量包乎天地之外微先生不能成光武之
大微光武豈能遂先生之高哉而使貪夫廉懦夫立是
大有功於名教也仲淹來守是邦始構堂而奠焉廼復

其為後者四家以奉祠事又從而歌曰雲山蒼蒼江水
泱泱先生之風山高水長

朱從道名述

天聖紀號之六載樞密留守侍郎齊郡公以東朝舊德
右弼上賢將啟秉鈞之猷尚圖分政之任善下成乎江
海養浩充乎天地誠明之際無隱不及居一日曰祖宗
之都儀刑萬邦道德之所興禮樂之所出風化不作四
方何仰哉乃首訪膠庠躬省弦誦敦六籍以恢本發四

科以彰善於是人樂名教復鄒魯之盛士為聲詩登周
召之美既而丘園初秀閎閱令嗣拳拳允集濟濟如歸
沛國朱生世嚴冠冕幼苦霜露憫先構之將墜忽中陵
之見育公特命就學果知向方豹以革而有文鴻亦漸
而無咎公又嘉其遷善以從道而名焉仍命字之云在
復之六四曰中行獨復以從道也言能體中而行特從
於道以斯而復君子之象請字曰復之庶左右於名矣
然則道者何率性之謂也從者何由道之謂也臣則由

乎忠子則由乎孝行已由乎禮制事由乎義保民由乎
信待物由乎仁此道之端也子將從之乎然後可以言
國可以言家可以言民可以言物豈不大哉若乃誠而
明之中而和之揖讓乎聖賢蟠極乎天地此道之致也
必大成於心而後可言焉朱生其拜公之命勉之哉抑
文與學者道之器也以君子乘之則積而不敗不以君
子乘之則滿而致覆朱生其拜公之命慎之哉嘻子未
預於教也弗學而志窮如玉之未攻如泉之在蒙汨焉

而弗見其實昧焉而莫朝於宗子既預于教也克學而
神悟如金之在鑄如驥之方御躍焉可成乎美器騰焉
可致乎夷路者也仲淹觀士人中有青衿詩書素髮猷
畝名不登搢紳之議目弗接軒冕之姿彼何不遇之甚
哉朱生進德有漸屬文未幾始登庠序之列廼被巖廊
之知此何遇之甚哉繫爾門之濟美歟抑我公之善
教歟論者曰公之旨也豈徒正爾之名蓋將成爾之德
激清學校騰休都邑俾夫多士聳善庶邦成流格美俗

於詩書被頌聲於金石致我宋之文炳焉復三代之英
抑公之盛德乎朱生振迹於盛德之下發名於善教之
始何必申繻之劇論豈異夫子之榮褒者哉當夙夜懷
之不墜我公之令訓也其庶幾乎



宋文選卷六

欽定四庫全書

集部

宋文選卷

七至九

詳校官中書_臣張經田

助教_臣常循覆勘

總校官知縣_臣楊懋珩

校對官中書_臣王彞憲

謄錄監生_臣章玉植

欽定四庫全書

宋文選卷七

王禹偁文

投宋拾遺書

十一月二十日鄉貢進士王某謹齋莊沐浴裁書百拜
於拾遺執事某嘗謂書契以來以文垂教者首曰孔孟
之道始否而終泰則孟不足侔於孔也何者夫子連聘
七十國而無尺土之位則否於始也明矣洎祖述堯舜

憲章文武張三綱之目提五常之領制禮以檢人迹作樂以和人心恢刑政以救人失常祭祀以介人福使後之為君者為臣者為父者為子者不可斯須而離也則泰於終也又明矣孟子生不享其位死不行其教所著書亦在世之空文爾孰學而行之乎唯皮子請以孟氏為學科屬唐祚將終棄而不用可痛惜哉孟軻氏沒揚雄氏作時哀平失道賢莽用權子雲以窮愁著書始務脫禍故作太玄準周易法言準論語微機深旨世人鮮

知能師而受者止一侯芭而已方之孟氏季孟間也揚
雄氏喪文中子生知隋運將終聖道來躋退居河汾間
修先王之業九年而成王氏六經門弟子有若鉅鹿魏
徵河南房元齡京兆杜如晦咸北面師之隋文中子
迹逝矣門弟子歸於唐盡出先師之道以弼於文皇故
能立貞觀之業垂三百年傳十八葉夫豈非王氏教之
效歟謂隋之夫子焉雖劣於仲尼而復優於孟揚又明
矣文中子滅昌黎文公出師戴聖人之道述作聖人之

言從而學者有若趙郡李翱江夏黃頤安定皇甫湜固其徒也然位不足以行其道時不足以振其教故不能復貞觀之風矣獨以詞旨幽遠規正人倫亦曰唐之夫子焉下韓氏二百年世非無其文章罕能聚徒衆於門張聖賢之道矣其或者復授於明公乎明公履孔孟揚雄之業振仲淹退之之辭矧天與其時身得厥位則追還唐風不為難焉然登明公之門師明公之道者甚未衆止聞胡田二君矣豈明公道高德深之所隔也而誨

人誘善之未至耶某又聞不傷胎卵之命則麟鳳見矣
不骨死馬之骨則千里之駒來矣明公方欲張姬孔之
道聚游夏之風盡以某為首則賢於某者不遠千里而
至矣賢既至則明公之道得不光明乎道之光明也則
明公得不為宋之夫子乎得不為文之大柄乎頃者明
公之典宋魯也某嘗策杖辭親揭厲行潦編文著書求
明公之顧一接威重屬明公有泰山之禱某以晨羞闕
貢旅火是逼不果志業彷徨而歸居魯西二年間貧病

相絆乞衣假食以給切累勉強為丈皆有悲愁寒凍之意不知他人之見者憫乎咎乎周乎舍乎但以硯席舊交變化殆盡故里眈眈以為不才今年春始敢囊琴笈丈來詣輦轂登明公之門以求譽師明公之道以進身未知明公按劍而拒之解榻而延之向所謂以某為首則賢於某者不遠千里而來矣其在今日哉且某輟旨甘之具為桂玉之費久留闕下則身與親凍餒俱至矣進之退之俟明公命

答黃宗旦書

某白秀才黃生足下淳化初某自西掖貶官商洛生走
僕齋書且引孫何丁謂之事求知於我後一年某徵拜
右正言直昭文館改禮部員外郎知制誥召入翰林充
學士留闕下者二年生未嘗及吾門洎某黜守滁上生
復辱書惠文以尋前好是生不以位之高下專以道求
於我也甚善甚善觀生之文詞理雅正讀之忘倦若與
胡舍人論春秋書述數千年事迹議數十家得失剖析

明白若抵諸掌雖古作者無以過此又顏子好學論援經而證事義盡而語簡使薛邕而自為之未必至是生道日益而文日新也某前書所謂生之文二子之文也天下人將知之不誣矣然而謀道者貴乎有益求知者貴乎盡心生之於我也厚矣我之於生也其有隱乎何者某讀生正漢臣策對一章文義誠為高古其間青晁錯不言王道謂漢文幾於王矣以史傳較之責錯太重褒文稍過耳語曰擬人必於其倫又曰人之有過各於

其黨觀過斯知仁矣說者曰小人不能行君子之行非
小人之過也夫行王道者禹湯文武周公而已漢文何
主哉言王道者孔子孟軻荀卿揚雄而已晁錯何人也
故子長稱錯學申商刑名峭直刻深者也是以錯之對
策不根古道直指時事而亦有譏焉其對國之大體引
五帝者蓋言漢文不能行帝道也對人情之終始引三
王者蓋言漢文不能行王道也對直言極諫引五霸者
蓋言漢文止正師納諫如五霸焉志在削諸侯尊天子

亦伯臣之傑者也又其殺身奉國有足多者於王道則遠矣故曰責錯太重者為是也夫西漢諸帝孝文最賢節儉愛人誠得之矣幾乎王道則恐未能孟子稱仁政必自經界始而漢廢古井田用秦阡陌是本已去矣禹會塗山玉帛萬國一防風後至而殺之不赦周公於三叔親可知也流言一作伐而滅之吳王稱疾不朝文帝賜之几杖養成大惡流患子孫行王道者果若是乎至嬖鄧通為賢臣放賈生為王傳惑辛垣平之妖而黷祀

五帝忿馮唐之諫而曰獨亡間處耶失德盈編不可悉
數故曰褒文稍過者是也雖然生以大儒之行專取王
道亦無累於文也某以朋友切磋之道待生而有是說
也生以為何如某頓首

答張扶書

秀才張生足下僕之登第也與子之兄為同恩生故僕
兄事子之兄父事子之父子之於僕亦弟也子又以攜
文致書問道於我他人宜有答也况子之於我哉然僕

頃嘗為長洲令因病起抄書得目疾不喜視書書不讀
久矣雖強之少頃必息其目不數日不能竟一卷用是
見僕道益荒而文益衰也又四年之中再為謫吏頓挫
摧辱殆無生意以私家衣食之累未即引去黽勉于
簿書間以度朝夕尚有意講道而評文乎為子力讀十
數章茫然難得其句昧然難見其義可謂好大而不同
俗矣夫文傳道而明心也古聖人不得已而為之也且
人能一乎心至乎道修身則無咎事君則有立及其無

位也懼乎心之所有不得明乎外道之所畜不得傳乎
後於是乎有言焉又懼乎言之易泯也於是乎有文焉
信哉不得已而為之也既不得已而為之又欲乎句之
難道耶又欲乎義之難曉耶必不然矣請以六經明之
詩三百篇皆儷其句諧其音可以播篴弦薦宗廟子之
所熟也書者上古之書二帝三王之世之文也言古文
者無出於此則曰惠廸吉從逆凶又曰德日新萬邦惟
懷志自滿九族乃離在禮儒行者夫子之文也則曰衣

冠中動作慎大讓如慢小讓如僞云云者在樂則曰鼓
無當於五聲五聲不得和水無當於五色五色不得
不彰在春秋則全以屬辭比事為教不可備引焉在易
則曰乾道成男坤道成女日月運行一寒一暑夫豈句
之難道耶夫豈義之難曉耶今為文而捨六經又何法
焉若第取其書之所謂弔由靈易之所謂朋盍簪者模
其語而謂之古亦文之弊也近世為古文之主者韓吏
部而已吾觀吏部之文未始句之難道也未始義之難

曉也其間稱樊宗師之文必出於己不襲蹈前人一言
一句又稱薛逢為文以不同俗為主樊薛之文不行於
世吏部之文與六籍共盡此蓋吏部誨人不倦進二子
以勸學者故吏部曰吾不師今不師古不師難不師易
不師多不師少惟師是爾今子年少志專雅識古道又
其文不背經旨甚可嘉也姑能遠師六經近師吏部便
句之易道義之易曉又輔之以學助之以氣吾將見子
以文顯於時也某頓首

再答張扶書

秀才張生足下僕之前書欲生之文句易道義易曉遂引六經韓文以為證生繼為書啟謂揚雄以文比天地而下云云者甚乎哉子之篤於道而好於古者也僕為子條辨之庶知僕之用也子之所謂揚雄以文比天地不當使人易度易測者僕以為雄自大之詞也非格言也不可取而為法矣夫天地易簡者也測天者知剛健不息而行四時測地者知含弘光大而生萬物天地畢

矣何難測度哉若較其尋尺廣袤而后謂之盡則天地一器也安得言其廣大乎且雄之太玄準易也易之道聖人演之賢人注之列於六經懸為學科其義甚明而可曉也雄之太玄既不用於當時又不行於後代謂雄死已來世無文王周孔則信然矣謂雄之文過於伏羲吾不信也僕謂雄之太玄乃空文爾今子欲舉進士而以文比太玄僕未之聞也子又謂六經之文語艱而義奧者十二三易道而易曉者十七八其艱奧者非故為

之語當然矣今子之文則不然凡三十篇語皆迂而艱也義皆昧而奧也豈子之文也過於六籍耶若猶未也子其擇焉子謂韓吏部曰僕之為文意中以為好者人必以為惡焉或時應事作俗下筆令人慚及示人人即以為好者此蓋唐初之文有六朝淫風有四子艷格至貞元元和間吏部首唱古道人不之從故吏部意中自是而人能是之者百不一二下筆自慚而人是之者十有八故吏部有是歎也今吏部自是者著之於集矣自

慙者棄之無遺矣僕獨意祭裴少卿文在焉其畧云儋石之儲不供於私室方丈之食每盛於賓筵此必吏部自慙而當時人好之者也今之世亦然也子著書立言師吏部之集可矣應事作俗取祭裴文可矣夫何惑焉又謂漢朝人莫不能文不獨司馬相如劉向揚雄為之最是謂功用深其文名遠者數子之文班固取之列於漢書若相如上林賦喻蜀封禪文劉向諫山陵揚雄議邊事皆子之所見也曷嘗語艱而義奧乎謂功用深者取

其理之當耳非語迂義暗而謂之功用也生其志之向
有江翊黃者自謂好古僕見其文義尚淺故答之曰修
之不已則為閒人今子希慕高遠欲專以絕俗為至故
僕欲子之文句易道義易曉也孔子曰由也兼人故退
之求也不及故進之亦僕之志也某頓首

代伯益上夏啟書

臣益言臣與先帝比肩而事堯舜在二十二人之數先
帝以老臣為賢以天下授臣臣德薄力寡不足當之且

知天意人事盡歸於吾君矣今君身臨大寶手握神器
老臣得伸一言以為裨益哉夫天下者非一人之天下
也天下之天下也理之得其道則民輔之失其道則民
去之民既去又孰與同其天下乎故帝堯不授於子而
授於大舜大舜不傳於家而傳於先帝蓋恐失道而民
去矣是知親一子則不能子兆人成一家則不能家六
合聖人之用心也如是先帝得之雖勤吾君繼之忽忘
其勤臣恐失大寶而毀神器也先帝力拯橫流為民粒

食得九疇定九州乘四載距四海櫛風沐雨奠山濬川
却昏墊之憂平水土之患以父殂而是念聞子哭而不
名然後六府孔修四隩攸宅興播植之科定貢賦之差
億兆熙熙以成淳化是以授禪而有天下可謂艱難矣
及其在位也卑宮室惡衣食見罪人而泣聞昌言而拜
故能會諸侯於塗山執玉帛於萬國可謂勤儉矣今君
得不思其艱難乎念其勤儉乎且創業者易守文者難
始則苦於焦勞終或流於逸樂今君生居帝宮坐即大

位勿謂家傳之勿謂已有之宜惕惕而懼其失也矧乎
天無所親親於有德人無所懷懷於有仁苟不肖而毀
先業亦為臣羞吾君以臣言為何哉聽用之則銘於案
几可也罪咎之則斥於荒裔可也庶幾老臣朽骨泉壤
見先帝而無愧色矣斯言非佞君其念之臣益頓首

擬留侯與四皓書

漢丞相留侯張良謹裁書遣使致於商山四先生侍者
蓋聞有天地以來聖人曰軒轅有崆峒之請又曰帝堯有

箕山之讓况乎風移世變民澆化漓北面而為臣者乎
有國家之未決智慮所不及得不資取於賢士哉先生
抱大道藏大器榮辱之事出於身外興亡之理了於掌
中膠漆雲泉泥滓爵位瓊林瑤池以遊以息雲漿霞饌
以飲以食芳君桂父先生之交也青鸞紫鳳先生之駕
也龜亡鶴天神氣愈清桂朽椿枯童顏未改萬乘不能
屈其節千金不能聘其才真所謂神仙中人風塵外物
然而歷觀古之聖賢未嘗不有意於民也故隱見隨其

時語默得其所進則為天下之福退則為天下之亂在
暴秦勃興荼毒華夏虎猛擇肉網密凝脂君德甚於虎
狼人命輕於草芥先生知國不可輔民不可化拂衣高
蹈遁於山林其隱也可謂得其時矣今皇帝奮布衣提
利劍撥大亂定大難起龍虎於豐谷會雲雷於泗濱席
卷亂秦電掃強楚可謂英雄矣既而革秦之暴纂堯之
緒定覆盆之固成垂拱之風唯於儲嗣之間忽有廢立
之義臣下股慄弗敢違寧良與帝同起於草莽間始五

六年經七十戰出奇畫策未嘗有一事見違唯於此時言
不獲用既掉三寸舌為帝者之師封萬戶侯乃布衣之
極敢於此際愛死不諫乎蓋恐死而無益於國事矣良
又聞古之天下者禪讓於賢今之天下者封樹其子亦
已德薄於古矣苟不選賢擇能樹嫡立長能無毀宗社
乎今太子為人元良立事貞固少海流潤潄雷震聲三
善克隆百枝無喪帝欲廢而不用天下失望朝廷愕然
先生於此時可不有意於民哉良願先生出雲關開

岫幌駕玄鶴馭金虬俯降殿庭辱對旒冕定天下之惑
決君上之疑隱見語默之道豈獨美於昔賢耶以免於
聖人之所議望先生無截轅杜轡之虞發函一披則萬
國幸甚良頓首

待漏院記

天道不言而品物亨歲功成者何謂也四時之吏五行
之佐宣其氣矣聖人不言而百姓親萬邦寧者何謂也
三公論道六卿分職張其教矣是知君逸於上臣勞於

下法乎天也古之善相天下者自咎夔至房魏可數也
是不獨有其德亦皆務於勤耳况夙興夜寐以事一人
卿大夫猶然况宰相乎朝廷自國初因舊制設宰臣待
漏院於丹鳳門之右示勤政也至若北闕向曙東方未
明相君啟行煌煌火城相君至止噦噦鸞聲金門未闢
玉漏猶滴徹蓋下車於焉以息待漏之際相君其有思
乎其或兆民未安思所泰之四夷未附思所來之兵革未
息何以弭之田疇多蕪何以闢之賢人在野我將進之

佞人立朝我將斥之六氣不和灾眚將至願避位以禳
之五刑未措欺詐日生請修德以釐之憂心忉忉待旦
而入九門既啟四聰甚邇相君言焉時君納焉皇風於
是乎清夷蒼生以之而富庶若然總百官食萬錢非幸
也宜也其或私讎未復思所逐之舊恩未報思所榮之
子女玉帛何以致之車馬器玩何以取之姦人附勢我
將陟之直士抗言我將黜之三時告灾上有憂色構巧
詞以悅之羣吏玩法君聞怨言進諂容以媚之私心慙

惛假寐而坐九門既開重瞳屢迴相君言焉時君惑焉
政柄於是乎墮哉帝位以之而危矣若然則死下獄投
遠方非不幸也亦宜也是知一國之政萬人之命懸乎
宰相可不慎歟復有無毀無譽旅進旅退竊位而苟祿
備員而全身者亦無所取焉棘寺小吏王某為文請誌
院壁用規於執政者年月日記

四皓廟碑

易稱知進退存亡而不失其正者其唯聖人乎先生避

秦知亡也安劉知存也應孝惠之聘知進也拒高祖之命知退也四者備矣而正在其中先生非聖而孰為聖乎若其秦亂而不避則焚書坑儒高斯之流也漢危而不出則素隱行怪巢由之徒也應高祖之命則溺其冠而騎其項矣拒孝惠之聘則功不立而名不稱矣引而伸之先生可謂全德者矣嘗試論之曰古稱周公聖人也鞭伯禽教孺子居攝六年明辟未復而召公不說於內三叔流言於外盛德大業幾墜於地吁扶幼君秉大

政之難也有如是哉觀乎戚姬之嬖如意之寵以妾並
后以孽代宗本根一揺社稷將墜咸謂扶蘇之賜死胡
亥之亡國可翹足而待也何止炎靈之不祀抑亦黔首
之罹禍豈無留侯陳八難罷六國則可議主鬻則以水
而投石也豈無曲逆間強楚解長平則可言立嫡則圓
鑿而方枘也先生一出而助之一言而定之漢庭公卿
皆出其下而能錙銖鍾鼎桎梏衣冠安萬乘而不有其
功抗匹夫而不食其祿自非至人達識孰能與於此乎

向使先生定漢嗣為漢臣報德議功必在平勃之右當
以左輔右弼前疑後丞而處之居是時也以四鉅賢事
一少帝挾震主之威負不賞之功又何止流言不說之
事哉欲望其茹紫芝卧商嶺其可得乎是知先生之出
非獨謀漢也實將救時也先生之退非獨全身也亦將
矯世也危而護之不宴安於獨善可謂救乎時矣定而
去之不乘時以聚祿可謂矯乎世矣用是警民猶有建
相立順之徒矣嗚呼世之為人臣議廢立者可勝道哉

或因定策而專國或因援主而無君戕殺完殘何莫由
此其後滔天於莽卓盜國於曹馬移徙龜鼎易於奕棋
累累簡編可為太息是以先生危則坐之安則去之其
來也至公於萬民其往也無私於一身前所謂知進退
存亡而不失其正者千古四賢而已或者周公相成王
攝天子功成治定制禮作樂號為先聖歷代仰之豈先
生之道過於周公乎愚曰周公秉文武之業知王化可
興故輔之以行道焉先生當暴秦之後知伯道終雜故

去之以遠害焉周公聖人之用者先生聖人之晦者但
時異而迹殊耳非所謂過乎周公者辛卯歲予坐事解
制誥職翌日有商於貳使之命下車拜廟西山之側退
立廊廡古碑在焉自唐御史大夫贊皇李公而下作者
若干人因歷覽之美則美矣叙先生之道似有未盡就
館濡筆申之以碑斯文也豈直歌鴻飛狀鶴髮而已哉
實欲使立朝廷為臣子而挾幼冲圖富貴者聞而知懼
亦春秋誅亂臣賊子之旨也其詞曰

猗歟先生時行則行高眠商嶺逃難秦坑知秦之祚亡
於子嬰知漢之祚存於惠盈一言悟主萬邦以貞不有
其功不食其祿遠害全身矯世勵俗清泉洗耳紫芝充
腹獵犬自烹冥鴻不復矯矯高節悠悠後來漢之宸園
晉之愍懷江充厚誣賈后雄猜先生不生孰為來哉昏
亂之世廢立不已操欺孤兒莽抱孺子成既自我權亦
歸已先生不生孰將去矣蒼野戕戕我祠荒薜蘿遺像斯
在德音可歌清風廩廩素髮皤皤永懷貞道刻石山阿

宋文選卷七